


Мереке қарсаңындағы марапаттау

Мемлекет басшысы Нұрсұлтан Назарбаев Ақордада ел тәуелсіздігінің 14 жылдығына орай республиканың бір топ азаматтарын мемлекеттің жоғары наградаларымен марапаттап, бірқатар әскери қызметшілер мен құқық қорғау органдары саласы қызметкерлеріне әскери және арнаулы атақтар мен сынштық шендер тапсырды.



Сейфолла ШАЙЫНҒАЗЫ, “Егемен Қазақстан”.

Олардың қатарында М.Әуезов атындағы Қазақ мемлекеттік академиялық драма театрының әртісі З.Шәріпова — “Отан” ордені, Энергетика және минералдық ресурстар министрі В.Школьник — “Қазақстан Республикасының Тұңғыш Президенті Нұрсұлтан Назарбаев” ордені, Қазақстанның Демократиялық партиясының төрағасы М.Нәрікбаев — II дәрежелі “Барыс” ордені, “Егемен Қазақстан” республикалық газеті” ААҚ президенті С.Абдрахманов — “Парасат” ордені, Орыс православие шіркеуінің Астана және Алматы митрополиті Мефодий (Н. Немцов) — II дәрежелі “Достық” ордені, Қорғаныс министрінің бірінші орынбасары Б.Дәрбеков, Қарағанды облысы ішкі істер департаментінің бастығы А.Кулинич, Бас прокурордың бірінші орынбасары І.Бактыбаев және басқалар бар.

Біз сіздермен еліміздің тәуелсіздігінің 14 жылдығы қарсаңында кездесіп тұрмыз, деді Нұрсұлтан Әбішұлы награда алғандарды құттықтай келіп. Кез келген мем-

лекеттің тәуелсіздігі бірінші кезекте қуатты Қарулы Күштермен және ішкі тыныштықты сақтап, азаматтардың құқықтары мен еркіндіктерін қорғайтын құқық қорғау органдарының лайықты қызметімен камтамасыз етіледі. Сіздер сол үшін қызмет етесіздер.

14 жылда біз көптеген жетістіктерге қол жеткіздік, оны біз де мойындаймыз, әлем де мойындап отыр. Қазақстандық ұлттардың топтасқандығын сақтап, мемлекеттің тәуелсіздігін нығайттық, қажетті реформаларды жүргізу арқылы халықтың тұрмысын жақсарттық. Сондықтан да халық кешегі соңғы сайлауда сіздер мен біз атқарған жұмыстарға өз пікірлерін бірауыздан білдірді.

Қандай да болмасын табысты әкелетін халық, оның ішінде адал еңбегімен және өнегелі мінез-құлықтарымен өзгелерге үлгі бола білетін азаматтар. Сондықтан баршанызға алдағы уақыттарда да зор табыстар тілеймін.

Марапаттау рәсімі кезінде сөз алған бірқатар азаматтар Елбасын өткен сайлауда айқын басымдылықпен жеткен жеңісімен құттықтап, алған жоғары наградалары үшін шынайы алғыс сезімдерін жеткізді.

